

INUIT ATAQATIGIIT

Inatsisartuni



UPA 2019/65
24-04-2019
Sofia Geisler

Provstudvalgip atorunnaarsinneqarsimanerata nalilersueqqittoqarnissaanik UKA2019imut piumasaaqat. Nalilersuinerup imarissavaa provstudvalgip atorunnaarsinneqarnerani sunniutit suut uuttuuttigineqarsimanersut neriutillu suut eqquussimanginersut. Nalilersuinerup naggataarutaasumik imarissavaa provstudvalgip atulerseqqinneqarnissaanut suut innersuussutaassanersut Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartuni ilaasortaq Jens Napātôk, Partii Naleraq)

Ilageeqarneq pillugu Inatsisartut inatsisaat nr. 9, 19. maj 2010-meersup akuersissutigineqarneratigut, Kalaallit Ilagiinni aningaasaqarnermut immikkut nakkutilliisut atorunnaarsinneqarneranni sipaaruteqarnissamik pisariillisaanermillu siunertaqarneq naammassineqarsimanersoq pillugu Naalakkersuisut misissuinissamik peqquneqarnissaannik anguniagaqartumik siunnersuummik siuliani taaneqartumik Jens Napātôk Inersuarmi.

Inatsimmik paasinninnerput naapertorlugu, Provsti ilagiit sinnissaasa inassuteqarneratigut proveqarfimmut ukiumoortumik missingersuusiortarpoq.

Kalaallit Nunaanni biskopip biskopeqarfiup qitiusumik aqunneqarnera ilagiinnillu allaffissornikkut isumaginnittuunera pissutigalugu, Nunatta Karsianit Ilagiinnut aningaasat atugassanngortinneqartut nakkutigineqarnerat naammassineqartoq isumaqarpugut. Peqatigisaanillu Namminersorlutik Oqartussani nakkutilliinermik ingerlatsisut immikkoortuni assigiinngitsuni atuinermik nakkutiginneqissaanermik ingerlatsisut ilisimagatsigu, nakkutilliinerit pisariaqartut isumagineqareersut Inuit Ataqatigiit isumaqarput.

Taamaammat Inuit Ataqatigiit Jens Napātûp siunnersuutaa tapersinngilaat.